

Evening Dogri (NSD) Bulletin 21-09-2024

आकाशवाणी

खास खास खबरां

- 1 प्रधानमंत्री नरेन्द्र मोदी होरें आखेआ ऐ जे क्वाड भारत-प्रशांत क्षेत्र च शांति, तरक्की ते खुशहाली लेई कम्म करने लेई मुख् समूह दे तौरा उप्पर सामने आया ऐ।
- 2 बन्ने उप्पर शांति ऐ की जे पाकिस्तान केन्द्र दी मजबूत सरकार थमां डरे दा ऐ, आखेआ गृहमंत्री अमित शाह होरें।
- 3 एयर मार्शल अमर प्रीत सिंह नियुक्त होए अगले चीफ ऑफ एयर स्टाफ।
- 4 आप नेता आतिशी होरें दिल्ली दे मुख्मंत्री पद दी सगंध लैती।
- 5 केन्द्र प्रत्यक्ष कर बोर्ड नै आयकर विवादें दे मामले च बकाया अपीले गी सुलझाने लेई प्रत्यक्ष कर विवाद से विश्वास योजना 2024 शुरू कीती।
- 6 भारत चेन्नई टैस्ट च बंगलादेश दे खलाफ मजबूत स्थिति च।

<><><><><><>

PM-Quad

प्रधानमंत्री नरेन्द्र मोदी होरें आखेआ ऐ जे क्वाड हिंद-प्रशांत क्षेत्र च शांति, तरक्की ते समृद्धि लेई कम्म करने आले समान बचारधरा आले मुख् दे इक मुख् समूह दे तौरा पर सामने आया ऐ। प्रधानमंत्री होर अमरीका च डेलावेयर दे विलमिगटन च शुरू होने आले 6में सलाना क्वाड लीडरें दे शिखर सम्मेलन च हिस्सा लेने आस्तै जावा'रदे न। मेद ऐ जे क्वाड समूह दे सदस्य जलवायु परिवर्तन थमां लेइयै महत्वपूर्ण उभरादे प्रौद्योगिकीजनेह केई मुद्दें पर चर्चा करगंन। क्वाड शिखर सम्मेलन शा पैहले प्रधानमंत्री नरेन्द्र मोदी अज्ज रातीं

राष्ट्रपति जो बाइडेन हुंदे नै दपक्खी बैठकां करगंन। प्रधानमंत्री हुंदा आस्ट्रेलिया दे प्रधानमंत्री एंथनी एलबनिज ते जापान दे प्रधानमंत्री फूकमयो किशिंदा हुंदे कन्नै बी बैठकां करने दा कार्यक्रम ऐ। प्रधानमंत्री मोदी होरें भरोसा जताया ऐ जे ओह जो बाइडेन हुंदे कन्ने उंदी मलाटी दरान भारत ते अमरीका बश्कार व्यापक वैश्विक रणनीतिक सांझेदारी गी होर मजबूत करने आस्तै नमें रस्तें दी समीक्षा ते पंछान करने दी खुल्ल होग।

<><><><><><>

Amit Shah-Poonch Rally

बीजेपी दे वरिष्ठ नेता ते केन्द्री गृहमंत्री अमित शाह होरें अज्ज इस गल्ला उप्पर जोर भरेआ जे पाकिस्तान प्रधानमंत्री नरेन्द्र मोदी हुंदे थमा डरदा ऐ जेहदा नतीजा एह ऐ जे जम्मू दे बन्ने उपरा मते समें थमां संघर्ष विराम दी उल्लंघना नेई होई ऐ। आकाशवाणी जम्मू दे संवाददाता दी रिपोर्ट मूजब पुंछ जिले दे मेंढर थमां बीजेपी मेदवार मुर्तजा खान हुंदे समर्थन च इक रैलगी गी संबोधत करदे होई शाह होरें आखेआ जे बन्ने उप्पर शांति कायम ऐ ते मेंढर दे लोक ते बन्ने कन्नै लगने आले दुए जिलें दे लोक शांति ते रमानदारी कन्नै रवा'रदे न। उनें आखेआ जे 1990 थमां एह इलाका आतंकवाद दी वजह कन्नै बरबाद होई गेदा हा। उनें आखेआ जे नैशनल कांफ्रेंस, पीडीपी ते कांग्रेस दे राज च पहाड़ी गुज्जर ते बक्करवालें गी उंदे अधिकार थमां वंचित रखेआ गेआ। उनें एह बी आखेआ जे इनें लोकें दी वजह कन्नै गै जम्मू कश्मीर च पंचैत, बीडीसी ते डीडीसी दे चुनां मते चिरे थमां नेई होई सकै। शाह होरें आखेआ जे अज्ज 30 ज्हार थमां मते पंचैत, ब्लाक ते जिलें दे नुमायंदे लोक तंत्र दा नंद ले करदे न।

<><><><><><>

Air Force

एयर मार्शल अमर प्रीत सिंह जेहड़े इसलै एयर स्टाफ दे वाइस चीफ दे तौरा पर कम्म करा'रदे न, गी एयर स्टाफ दे अगले चीफ दे तौरा पर नियुक्त कीता गेआ

ऐ। अमर प्रीत सिंह इस म्हीने दी 30 तरीक दपैहरी एयर चीफ मार्शल विवके राम चौधरी हुंदे शा एयर स्टाफ दे चीफ दा औहदा सांभगन। अमर प्रीत सिंह होरें गी 1984 च भारतीय वायु सेना दे लड़ाकू पायलट स्ट्रीम च कमीशनंड कीता गेआ हा ते उनें तकरीबन 40एं बरें दी लम्मी सेवा दरान बक्ख-बक्ख कमांड स्टाफ, निर्देशक ते विदेशी नियुक्तिएं च अपनी सेवा दित्ती ऐ। एयर अफसर इक योग्य उड़ान प्रशिक्षक ते इक Experiment Test Pilot न जिंदे कश बक्ख-बक्ख किस्में दे फिक्स्ड ते रोटरी विंग विमानें उप्पर 5 जहार शा मते घैंटे दा उड़ाने उप्पर अनुभव ऐ।



Announcement in Dogri

आकाशवाणी जम्मू दा क्षेत्रीय समाचार एकांश 18 सितंबर, 2024 कोला त्रऊं गोड़े च होआ करदे विधानसभा चुनाव 2024 दे सिलसिले च जम्मू संभाग दे सब्बने 10 जिले दे बारे च विशेष जिला प्रोफाइल कार्यक्रमें दी इक्क श्रृंखला प्रसारित करार दा ऐ। इस सिलसिले च अजें तोहड़ी, डोडा, किश्तवाड़, रामबन ते रजौरी जिलें पर आधारित कार्यक्रम बी प्रसारित कीते जाई चुके दा ऐ ते हुन औंदी 22 सितम्बर गी पुंछ जिले पर आधारित विशेष कार्यक्रम दा प्रसारण कीता जाहग। एहदे परैन्त इस्सै म्हीने दी 24, 26, 27, 28 ते 30 सितंबर गी बडले 8:45 बजे बाकी रौहदे जिलें पर आधारित कार्यक्रम बी प्रसारित कीते जागन जिंदे च जम्मू संभाग दे इनें जिले दा ऐतिहासिक, पर्यटन ते राजनीतिक अवलोकन पेश कीता जाग स केंद्र शासित प्रदेश च होआ करदे विधानसभा चुनावें दे मद्देनजर, शुरु कीती गेदी इस श्रृंखला दा मकसद आकाशवाणी जम्मू दे श्रोताएं लेई जम्मू संभाग दे सब्बने 10 जिले दे हर इक्क विधानसभा क्षेत्र दे बारे च महत्वपूर्ण जानकारी प्रसारित करना ते उने गी जागरूक रखना ऐ।



Delhi CM

आप नेता आतिशी होरें शनिवारें दिल्ली दे मुख्मन्त्री पद दी सगंध चुक्की। एह दिल्ली दियां त्रीह ते सब्बने शा घट्ट उमरी दियां महिला मुख्मन्त्री न। एह भारत दी 17मीं महिला मुख्मन्त्री बनी गेइयां न। आप दे वरिष्ठ नेताएं दा एह थ्होड़ चिरे दा कार्यकाल होग की जे फरवरी म्हीने च राष्ट्री राजधानी दिल्ली च विधानसभा दे चुनां होने आले न। पैहली बारी विधायक बनी दियां आतिशी होर पार्टी दा मुख्मन्त्री चेहरा न ते अरविंद केजरीवाल हुंदे तिहाड़ जेल जाने मगरा उनें पार्टी च इक अहम भूमका नभाई। कालबाजी थमां विधायक आतिशी हुंदा नां केजरीवाल हुंदे मुख्मन्त्री पद थमां स्तीफा देने मगरा इस पद लेई सब्बने शा अग्गे हा। 43 ब'रे दी आतिशी होरें दिल्ली दिशं सब्बने थमां घट्ट उमरी दियां महिला मुख्मन्त्री बनी गेइयां। शीला दिक्षित होर 60 ब'रें दियां हियां जिसलै उनें दिल्ली दी मुख्मन्त्री दा पद सांभेआ हा ते सुषमा स्वराज होरें जिसलै एह पद सांभेआ हा, ओह उसलै 46 ब'रें दियां हियां। आतिशी होर इसलै देसै च पच्छम बंगाल दी मुख्मन्त्री ममता बनर्जी दे कन्नै दूई महिला मुख्मन्त्री न।

<><><><><><>

CBDT-Tax

केन्द्रीय प्रत्यक्ष कर बोर्ड नै आयकर विवादें दे मामले च लंबित अपीलें गी सुलजाने लेइ प्रत्यक्ष कर विवाद से विश्वास योजना 2024 शुरू कीती ऐ। एह योजना अगले म्हीने दी पैहली तरीक थमां लागू होई जाग। डीटीवीएसवी जां ओहदे शा पैहले शपथ पत्र दायर करने आले करदाताएं गी घट्ट रकम देनी होग।

<><><><><><>

Congress

जम्मू कश्मीर च होआ करदे असैबली चुनाएं च कांग्रेस मेदवारें दे हक्कै च प्रचार लेई राश्ट्री प्रधान मल्लिकार्जुन खरगे होरें आखेआ ऐ जे उंदी पार्टी राहुल गांधी होरें गी दित्ती जा'रदी धमकिएं खलाफ बरोध प्रदर्शन शुरू करोग। आकाशवाणी दे जम्मू संवाददाता दी रिपोर्ट मूजब खरगे होरें गलाया जे कांग्रेस पार्टी कदें बी आरएसएस ते बीजेपी दे बंड पोआने आले एजेंडे अगगे नेई झुकोग। अज्ज जम्मू च आयोजित इक संवाददाता सम्मेलन गी संबोधत करदे होई खरगे होरें आखेआ जे लोकसभा च विपक्ष दे नेता राहुल गांधी हुंदे खलाफ बीजेपी दे नेताएं आस्सेआ कीती गेदी कथित ऐतराज जोग टिप्पणिएं पर आखर प्रधानमंत्री होर चुप कीह न। उनें आखेआ जे मोदी होर बीजेपी ते आरएसएस दे नेताएं दे कथित भडकाऊ ब्यानें दी अनदिक्खी करे करदे न ते कोई कारवाई नेई करदे की जे ओह आपूं इनें नेताएं थमां डरदे न। खरगे होरें आरोप लाया जे राहुल गांधी होरें गी आतंकवादी ते राश्ट्र-बरोधी करार दित्ता जा करदा ऐ ते प्रधानमंत्री होर नेया करने आले लोकें खलाफ कोई कारवाई नेई करियै आपूं नेयी गलत चीजें गी बढावा देआ करदे न।

<><><><><><>

GEM

गौरमेंट-ए-मार्केट प्लेस नै सरकार दी 100 दिनें दी पैहलकदमी दे तौरा उप्पर अपने प्लेटफार्म उप्पर लेने-देन करने आले विक्रेताएं ते सेवा देने आलें उप्पर लाए जाने आले लेन-दे नदी कीमतें गी घट्ट कीता ऐ। वाणिज्य ते उद्योग मंत्रालय नै आखेआ ऐ जे जैम नै अपना लैन-देन शुल्क च तकरीबन 33 फीसदी दी कमी कीती ऐ। जेह्दे कन्नै जैम विक्रेताएं गी जां सेवा देने आलें गी होर मता मकाबले जोग बनाने लेई मता फायदा होने दी मेद ऐ। जैम नै पोर्टल दी नमीं राजस्व नीति दी घोषणा कीती ऐ। जेह्डी इस ब'रे 9 अगस्त थमां लागू होई गई ऐ। इस नीति मताबक 10 लक्ख रपे तगर दी कीमत आले सब्बै आर्डरें उप्पर हुन कोई शुल्क नेई लग्गोग। जदकि पैहले एह्दी सीमा 5 लक्ख रपे तगर ही। मंत्रालय नै

आखेआ ऐ जे जैम उप्पर तकरीबन 97 फीसदी लैन—देन उप्पर कोई शुल्क नेई लग्गोग। उनें आखेआ जे 10 लक्ख रपे कोला बद्ध आर्डर शुल्क उप्पर नामात्र 0.03 फीसदी शुल्क लैता जाग।

<><><><><><>

Environment 100 Days

पर्यावरण, जंगलात ते जलवायु परिवर्तन मंत्रालय नै जंगली जीव—जंतुएं दे रौहने आली थाहरें दे संगठित विकास लेई 100 दिने दा लक्ष्य हासल करी लैता ऐ। हाल च गै केन्द्री मंत्रिमंडल नै 2 जहार 6 सौ करोड़ रपे शा मते दे खर्चे कन्नै जंगली जीव जंतुएं दे आवास विकास योजना गी जारी रखने दी मंजूरी देई दित्ती हीं कुल 55 बाघ रिर्सव, 33 हाथह रिर्सव ते 718 संरक्षित इलाके ते उंदे जोन गी इस योजना दा फायदा होग।

<><><><><><>

Cricket

चेन्नई दे एम.ए.चिदंबरम स्टेडियम च बंग्लादेश खलाफ खेड्डे जा'रदे टैस्ट मैच च भारत नै अपनी स्थिति बड़ी मती मजबूत करी लैती दी ऐ। पैहले टैस्ट मैच दे अज्ज त्रीये दिनै दा खेड्ड मुक्कने तगर बंग्लादेश दी टीम नै 4 विकटें दे नुक्सान पर 158 रंज बनाई लेते न। बंग्लादेश लेई शकिब अल हसन 5 ते नजमुल हुसैन शांतो 51 रंज बनाइयै क्रीज पर न। एह्दे शा पैहले अज्ज भारत नै 4 विकटें पर 287 रंज बनाइयै अपनी दूर्ई पारी घोषत करी दित्ती ते बंग्लादेश गी जित्त लेई 515 रंजें दा बड़ा बड्डा लक्ष्य देई दित्ता। भारत दी तरफा शुभमन गिल नै 119 ते ऋषभ पंत नै 109 रंजें दियां शानदार पारियां खेड्डियां। जेह्दी मदाद कन्नै भारत नै 4 विकटें दे नुक्सान पर 287 रंज पर अपनी पारी घोषत कीती। गिल ते पंत नै चौथी विकेट लेई 167 रंजें दी सांझेदारी कीती। एह्दे शा पैहले बंग्लादेश अपनी पैहली पारी च छडे 149 रंज गै बनाई सकेआ हा।



Khatana

बीजेपी दे वरिष्ठ नेता ते राज्यसभा सांसद इंजीनियर गुलाम अली खटाना होरें नेशनल कांफ्रेंस दे नेता ते साबका मुखमंत्री ओमर अब्दुल्ला हुंदे ओकड़े दावे गी खारिज कीता ऐ जेहदे च उनें आखेआ हा जे केन्द्र सरकार दे मंत्रिमंडल च इक बी मुस्लिम मंत्री नेई ऐ। इक बयान च सांसद खटाना होरें इस दावे गी खारज करदे होई मोदी सरकार दिएं कल्याणकारी गैहीं पर लोऽ पाई ते आखेआ जे नरेन्द्र मोदी हुंदी अगुवाई आहली केन्द्र सरकार नै जेहड़ियां पैहलकदमियां कीतीआं न उंदे करी वंशवाद दी राजनीतिक करने आहले अब्दुल्ला ते गांधी परोआरें अंदर डर—त्राह पैदा होई गोदा ऐ। खटाना होरें आखेआ जे इनें दौनें परोआरें केई दहाकें तगर वोट बैंक दी सियासत लेई मुस्लिम समुदाय गी हाशिये पर रक्खेआ। खटाना होरें इनें परोआरें आसेआ चुनाएं दरान मुस्लिम समुदाय लेई चानचक्क जागी दी चैंता दी सख्त निंदेआ कीती ते कन्नै एह दावा बी बन्नेआ जे 70एं बरें तगर एह परोआर मुस्लिम समुदाय दी अनदिक्खी करदे आए न।



One Nation One election

केन्द्री सूचना ते प्रसारण ते संसदीय मामलें दे राज्यमंत्री डॉ. मुरुगन होरें आखेआ ऐ जे प्रधानमंत्री नरेन्द्र मोदी हुंदी त्रीए कार्यकाल दी सरकार दे पैहले 100 दिनें च 15 लक्ख करोड़ रपे दी लोकें लेई कल्याण योजनाएं शुरु कीतियां अज्ज थूथूकोडी च बोलदे होई उनें आखेआ जे बुनियादी ढांचे लेई सरकार नै महिलाएं आस्सेआ चलाए जा'रदे घरें लेई 3 लक्ख रपे दा प्रावधान कीता ऐ।



India Brazil

भारत ते ब्राजील नै ऊर्जा क्षेत्र च मजूदा सैहयोग ते दपक्खी बपार च आपसी रिश्ते ते स्थाई ईधन खास तौरा पर जैव ईधन च सैहयोग दी समीखा कीती ऐ। एह गल्ल पेट्रोलियम ते कुदरती गैस मंत्री हरदीप सिंह पुरी ते ब्राजील दे खदान ते ऊर्जा मंत्री हुंदे बश्कार होई दी बैठक मगरा जारी कीते गेदे इक सांझे ब्यान च कीती गई ऐ। पुरी होरें वीरवारें थमां ब्राजील दे त्रै दिने दे दौरे उप्पर न।

<><><><><><>

Health Minister

सेहत ते परोआर कल्याण राज्य मंत्री अनुप्रिया पटेल होरें जारे भरियै आखेआ ऐ जे वैश्विक खाद्य बपार गी बधाने आस्तै खाद्य मानकें दा सैहयोग होना महत्वपूर्ण ऐ। एह अज्ज नमीं दिल्ली च वैश्विक खाद्य नियामक शिखर सम्मेलन 2024 दे तैहत आयोजित खेत्तरीय सम्मेलन गी संबोधत करा'रदियां हियां। उनें वैज्ञानिक रूप कन्नै खाद्य मामनकें गी लागू करियै उपभोक्ताएं दी सेहत बेहतर बनाई रखने पर जोर भरेआ ऐ। पटेल होरें आखेआ जे भारतीय खाद्य सुरक्षा ते मानक प्राधिकरण ते कोडेक्स एलिमेंटेरियम इक स्वस्थ ते सुरक्षत खाद्य प्रणाली दी दिशा च रलियै कम्म करा करदियां न। उनें आखेआ ऐ जे जैव प्रौद्योगिकी ते टिकाऊ राई-बाई दा अनुकूलन महत्वपूर्ण ऐ।

<><><><><><>